

- Quo teneas ipsum Prothea nodus abest.
 Cur sic? institor est, emit mendacia, nuge
 Sunt eius merces, fraus, scelus eius opes.
 15 Nugis, non bigis, dives redit iste loquelis,
 Non oculis locuplex, ore nec ęre potens.
 Non habet in bigis ceram¹, sed in ore venenum,
 Non rotat axe merum, sed rotat ore malum.
 Spes uxoris erat, pro se sudare maritum,
 20 Sed spes est sine re, sed sine messe labor.
 Non video naves ostro ridente superbas,
 Nec suspirantes pondere cerno rotas.
 In pelago consumpsit opes, ventrisque caribdim
 Pertulit in mediis prodigus emptor aquis.
 25 Scilla gule nocuit, non scilla freti; mare ventris,
 Non mare Neptuni, sorbuit eius opes.
 Ergo quid applaudit, quod ei maris ira nocere
 Nil potuit? nocuit plus tamen ira gule.
 Ne iaculis igitur verborum vestra sagittent²
 30 Pectora fallacis verba, cavete³ patres.
 Deviat á vero, verum potius sequar, immo
 Prosequar, ut finem consequar inde rei.
 Obicit hic undequę fidem sponseque reatum:
 Fallitur, unda nocens, sponsa fidelis erat.
 35 Unda fremens illum procul abstulit, ecce reatus!
 Sponsa precans isti profuit, ecce fides!
 Obicit hic, mecho patuisse domumque thorumque:
 Hec patuisse domum non negat, immo thorum.
 Claustra domus patefecit ei, non claustra pudoris,
 40 Esse studens alii grata, pudica sibi.
 Grata, pudica simul fuit. Hospicium dedit, ecce
 Gratia! mechari noluit, ecce pudor!
 Si decor absit, abest pudor, obicit iste. Repello!
 Ista decore nitet, ista pudore viget.
 45 Que virtus raro nitet hoc in tempore, verna
 Ista genis Helene, Penelopesque fide.
 Casta decens rarum est, sed si rarum, preciosum:
 Casta decens fuit hec, tunc preciosa magis.
 Non dedit ergo locum donis, ut falleret, ista:
 50 Non mentita fuit aurea gutta Iovem.
 Qui deludat eam, nec se Iovis alter inaurat,
 Qui predetur eam, nec Paris alter amat.
 Mechum vel mecham testes vocat hic, sed ab omni
 Iudicio tales curia sancta vomit.
 55 Quod fuerit cautus et dives, largus et emptor,
 In iuvenis facto quatuor ista notat.

1) 'merum' Cl. 'meram' R. 2) 'nostra sagitte' Hss. 3) 'cauere' R.